

STATUTS

dalla

Societad Ovra electrica Lumbrein

I. Disposiziuns generalas

Art. 1

Num, sedia Sut il num „Societad Ovra electrica Lumbrein“ (silsuenter numnada „SOEL“) exista ina societad enscretta el register da commerci per in cuoz nundeterminau el senn dad art. 828ss. DO cun sedia a Lumbrein.

La SOEL ei ina corporaziun da dretg privat cun participaziun dalla vischnaunca da Lumbrein.

Art. 2

Intent Igl intent dalla SOEL ei da construir, renovar, reparar, menar e mantener communablamein – el senn d'in agid per gidar sesez – la reit da provediment electric ella vischnaunca da Lumbrein (ed eventualmein en ulteriurs territoris), sco era da vender electricitat e porscher tut ils survetschs respectivs a commembers ed a tiarzas personas. Sch'il recav lubescha, survegnan ils commembers che retrain energia ni fan diever dils survetschs colligai cun quella, tariffas pli favoreivlas el rom dallas pusseivladads legalas. La SOEL sa construir e/ni menar implorts per producir energia surtut el sectur dallas energias regenerablas ed auters implorts da provediment d'energia sur conducts ni separticipar a tals, sco era far sclariments corrispondents.

La SOEL sa construir filialas e societads affiliadas en Svizra e separticipar ad outras interpresa en Svizra, sco era far tut

las fatschentas che stattan en in connex direct ni indirect cun siu intent. La SOEL sa cumprar, engrevgiar, vender ed administrar en Svizra proprietad funsila. Ella sa era far finanziaziuns sin agen quen ni sin quen jester, e far tut las fatschentas adattadas per promover igl intent dalla societad ni per facilitar sia ademplida.

II. Commembradi

Art. 3

Recepziun

Commember sa daventar mintga clienta e client dalla SOEL che ha siu domicil els vischinadis da Lumbrein e Vrin.

La recepziun sco commember succeda sin fundament d'ina declaraziun d'adhesiun en scret cun renconuschientscha dils statuts. Ina tala declaraziun survegnan ils clients ensemen cun il quen corrispudent l'emprema ga ch'eis retrain prestaziuns dalla SOEL.

Il commembradi scada automaticamein, aschiprest che la reit da provediment electrica vegn buca pli duvrada. Sch'enzagti renunzia facultativamein al commembradi, sto la disdetga en scret vegnir inoltrada per la fin d'in onn da gestiun, risguardond in termin da disdetga da treis meins. Resalvaus resta art. 9.

Art. 4

Dretgs ed obligaziuns

Mintga commember dalla SOEL ha il dretg da far diever dalla reit da provediment electrica e da retrer energia electrica el rom dall'incubensa da provediment dalla SOEL.

Ils commembers han ils medems dretgs e las medemas obligaziuns, aschilunsch che la lescha prevesa buc in'excepziun. Surtut ha mintga commember ina vusch alla

radunanza generala.

Ils commembers ein obligai da defender ils interess dalla SOEL en buna fei. In commember che violescha grevamein sias obligaziuns sco commember dalla SOEL, sa vegnir exclus entras l'administraziun. Ultra da quei sa el da tut temps vegnir exclus sin fundament da motivs impurtants.

Commembers che sortan dalla societad han il dretg d'ina restituziun dils screts da participaziun pagai dad els. La SOEL ei autorisada da scuntrar pretensiuns visavi in commember cun ses screts da participaziun. La vischnaunca da Lumbrein ha negin dretg d'ina restituziun da ses screts da participaziun, aschilunsch ed aschiditg che la SOEL ei buca dissolvida. Ella survegn el rom dalla disposiziun da dissoluziun e da liquidaziun (art. 17) ils mieds finanzials corrispondents; aschiditg vala in dretg da restituziun sco prorogaus. Resalvaus resta art. 9.

III. Disposiziuns finanzialas

Art. 5

Screts da participaziun

La SOEL emetta screts da participaziun sin il num dil possessur; la valeta nominala munta a CHF 100.–. Mintga commember sto cumprar silmeins in scret da participaziun ed astga cumprar maximalmein 20 screts da participaziun. Questa limitaziun dil diember maximal da screts da participaziun vala denton buca per la vischnaunca da Lumbrein.

A caschun da sia fundaziun surpren la SOEL dalla vischnaunca politica da Lumbrein la reit da transmissiun electrica e la reit da distribuziun ed ulteriurs implonts, parts d'implonts, sco era activas e passivas tenor la valetaziun dil biro d'inschigniers Brüniger + Co. SA. Ultra da quei surpren ella, tenor il contract davart valetas en naturalias, ina gliesta cumpletonta cun activas da totalmein CHF 3'659'497.10 e

passivas (capital jester) da CHF 156'674.75 per il prezi da CHF 3'420'000.—. Per quella summa emetta ella 34'200 screts da participaziun da mintgamai CHF 100.—.

In rapport en secret dils fundaturs el senn dad art. 834 al. 2 DO ei avon maun.

Art. 6

Quen annual La bilanza ei da far mintgamai per ils 31 da december.

Art. 7

Responsabladad Per ils deivets dalla SOEL stat buna sulettamein la facultad dalla societad. Mintga responsabladad persunala dils societaris ei exclusa.

Art. 8

Diever dils mieds Sch'il recav lubescha, survegnan ils commembers che retrain energia ni fan diever dils survetschs colligai cun quella, tariffas pli favoreivlas el rom dallas pusseivladads legalas.

Sch'ei resta suenter il manteniment e la cumpletaziun dils implorts, sco era suenter ulteriuras activitads e retenziuns el rom digl artechel d'intent e dallas disposiziuns statutaras in recav schuber el senn dad art. 858 DO, sa quel vegrir impundius en favur da programs che promovan in'utilisaziun ni producziun d'energia raziunala, efficienta e durabla.

Art. 9

Dretgs particulars dalla vischnaunca da Lumbrein Sch'ei semuossa a basa dil davos quen annual dalla SOEL che la mesadad digl agen capital ei buca pli cuvretga ni

sch'ei dat per autras raschuns indezis preoccuponts per ina surdebitaziun, ha la SOEL da menar tractativas cun la vischnaunca da Lumbrein davart in eventual transferiment da parts digl implont e dil menaschi e da tut ils dretgs e dallas obligaziuns colligai cun quels sin la vischnaunca da Lumbrein, sco era davart in transferiment dallas activitads da fatschenta dalla SOEL sin la vischnaunca da Lumbrein. En quei cass sa la vischnaunca da Lumbrein disdir immediat il commembradi senza risguardar in termin da disdetga. Ella ha immediat il dretg dalla restituziun dil capital dils screts da participaziun.

IV. Organisaziun

Art. 10

Organs

Ils organs dalla societad ein:

- la radunanza generala;
- l'administraziun;
- il revisurat.

A. Radunanza generala

Art. 11

Direcziun

Igl organ suprem dalla SOEL ei la radunanza generala. Ella seraduna ordinariamein ina ga ad onn, enteifer sis meins suenter la fin digl onn da gestiun. Radunanzas generalas extraordinarias vegnan convocadas, sche l'administraziun considerescha quei sco necessari ni sche silmeins in tierz dils commembers pretenda talas.

L'invitaziun allas radunanzas generalas succeda silmeins 20 dis avon il di da radunanza, indicond las tractandas che vegnan publicadas egl organ da publicaziun ufficial dalla

vischnaunca da Lumbrein.

Sch'ei dat proposas per midar ils statuts, sto il cuntegn essenzial dallas midadas proponidas vegnir publicaus.

Art. 12

Dretg da vuschar e conclus

Mintga commember ha ina vusch alla radunanza generala. Cun agid d'ina plenipotenza en secret sa in societari seschar substituir entras in confamigliar ch'ei habels d'agir e che viva ella medema casa ni entras in auter commember dalla societad.

La radunanza generala ei cumpetenta da decider, sch'ella ei vegnida convocada conform als statuts. Las elecziuns e votaziuns vegnan fatgas cun scrutini, sch'in tierz dils presents pretenda quei. Resalvond in quorum legal ni statutar, basegna ei per prender decisiuns l'approbaziun dalla maioritad dallas vuschs. Per dissolver la SOEL e per midar ils statuts basegna ei l'approbaziun da treis quarts da tut ils commembers presents alla radunanza generala. Per midar ils statuts concernent art. 5 (screts da participaziun, surtut la valeta nominala/il diember maximal da screts da participaziun), art. 9 (dretgs particulars dalla vischnaunca da Lumbrein), art. 12 (dretg da vuschar e conclus), art. 14 (dretg da substituziun dalla vischnaunca da Lumbrein), art. 16 (cumpetenza da decider, substituziun ed indemnizaziun) ed art. 18 (dissoluziun e liquidaziun) drova ei l'unanimitad dallas vuschs.

Art. 13

Cumpetenzas

La radunanza generala ha las suandontas cumpetenzas nuntransferiblas:

1. stipular e midar ils statuts;
2. eleger il president, l'administraziun ed il revisurat;

3. approbar il quen da gestiun e la bilanza, eventualmein decider davart l'utilisaziun dil recav schuber;
4. dar descharcha all'administraziun ed al revisurat;
5. decider sur d'expensas unicas che survargan la summa da CHF 100'000.-- ed expensas periodicas che survargan la summa da CHF 20'000.--;
6. decider davart tut las ulteriuras fatschentas, per las qualas la radunonza generala ei cumpetenta tenor la lescha ni ils statuts, ni las qualas l'administraziun suittametta alla radunonza generala.

B. Administraziun

Art. 14

Cumposiziun

L'administraziun secumpona da tschun commembers. La vischnaunca da Lumbrein ha il dretg dad esser representada cun ina persuna ell'administraziun. Ils commembers dall'administraziun vegnan eligi per treis onns ed ein reeligibels illimitadamein. Elecziuns enteifer ina durada d'uffeci valan tochen alla scadenza da quella. Cun excepziun dall'elecziun dil president seconstituescha l'administraziun sezza e determinescha siu agen uorden da fatschenta.

Art. 15

Competenzas ed obligaziuns

L'administraziun ei cumpetenta el rom dallas disposiziuns legalas e statutaras per l'administraziun e per tut las fatschentas dalla SOEL, las qualas ein buca resalvadas expressivamein alla radunonza generala ed al revisurat.

Las fatschentas dalla SOEL ein da menar risguardond las reglas dalla precauziun commerciala, las disposiziuns finanzialas precedentas e las prescripziuns legalas.

L'administraziun sa instituir cumissiuns specialas. Ils

commembers dalla cumissiun ston buc esser commembers dalla societad. Medemamein ei l'administraziun autorisada da transferir la gestiun ni singulas parts da quella e la substituziun corrispondenta sin ina ni pliras persunas che ston buc esser societaris.

Art. 16

Cumpetenza da decider, substituziun ed indemnizaziun

L'administraziun ei cumpetenta da decider, sche quater commembers ein presents. Ella decida cun la maioritad dallas vuschs; en cass da paritad dallas vuschs decida la vusch dil president.

Decisiuns en scret prendidas unanimamein sin via circulara valan sco conclus valeivels dall'administraziun ed ein da nudar el protocol a caschun dalla proxima sesida da quella.

La SOEL vegn representada anoviars cun valeivladad giuridica entras il president, il vicepresident ed igl actuar ni il cassier, e quei cun suttascripcziun collectiva en dus.

Ils commembers dall'administraziun e dil revisurat, sco era dallas cumissiuns dalla societad san vegnir indemnisi per lur activitat cun ina diaria moderada e cun la restituziun dallas spesas necessarias. L'administraziun ed ils incumbensi specials san ultra da quei vegnir indemnisi en ina moda moderada che corrispunda allas incumbensas ed alla carga da lavur. Tut las indemnizaziuns vegnan fixadas dil revisurat en cunvegnientscha cun l'administraziun. La summa totala dallas indemnizaziuns sto vegnir presentada separadamein el quen annual.

C. Revisurat

Art. 17

La radunanza generala elegia in revisurat per ina durada d'uffeci da treis onns.

Ella sa desister dall'elecziun d'in revisurat, sche:

- a) la SOEL ei buc obligada alla revisiun ordinaria;
- b) tut ils societaris approbeschan quei;
- e
- c) la SOEL ha buca pli che diesch plassas cumpleinas ella media annuala.

La renunzia vala era per ils onns sequents. Mintga societari ha denton il dretg da pretender sin il pli tard diesch dis avon la radunanza generala ina revisiun limitada e l'elecziun d'in revisurat corrispudent. En quei cass vegn la radunanza generala buc a decider davart l'approbaziun dil quen annual e davart l'utilisaziun dil gudogn da bilanza tochen ch'il rapport dil revisurat ei buc avon maun.

La cumissiun da gestiun dalla vischnaunca da Lumbrein ei ultra da quei autorisada da prender da tut temps investa da tut ils documents da contabilitad dalla SOEL.

En cass ch'ei vegn renunziau ad in revisurat, ei la radunanza generala tuttina cumpetenta d'incumbensar la cumissiun da gestiun dalla vischnaunca da Lumbrein da contollar las activitads da fatschenta dalla SOEL.

V. Disposiziuns finalas

Art. 18

Dissoluziun e liquidaziun

La SOEL vegn dissolvida, sche treis quarts dils commembers giavischan quei cun suttascripcziun e

pretendan per quei intent la convocaziun d'ina radunonza generala extraordinaria. Alla radunonza generala respectiva ston treis quarts dils presents approbar la dissoluziun. L'incumbensa da liquidar la societad ei da surdar alla vischnaunca da Lumbrein che ha da procurar per in'utilisaziun adequata dalla facultad dalla SOEL.

Suenter l'amortisaziun da tut ils deivets vegn la facultad dalla societad utilisada per restituir ils secrets da participaziun cun igl import nominal plus in tscheins commensurau. In'eventuala restonza vegn attribuida alla vischnaunca da Lumbrein per garantir e promover il provediment d'energia.

Art. 19

Publicaziuns	Las communicaziuns ed ils invits als commembers vegnan publicai egl organ da publicaziun ufficial dalla vischnaunca da Lumbrein ni tarmess en secret a tut ils commembers della societad. Ils organs da publicaziun dalla SOEL ein il Fegl ufficial svizzer da commerci ed il Fegl ufficial dil cantun Grischun.
--------------	--

Art. 20

Dretg subsidiar	Sche queste statuts cuntegnan neginas disposiziuns divergentas, valan las prescripziuns legalas dil Dretg d'obligaziuns svizzer.
-----------------	--

Art. 21

Entrada en vigur	Queste statuts vegnan approbai dalla radunonza dils fundaturs ed entran en vigur cun l'inscripziun el register da commerci.
------------------	---

Ils fundaturs:

(Flurin Capaul)

(Martin Capaul)

(Erwin Capeder)

(Giusep Capeder)

(Giusep Casanova)

(Gian Derungs)

(Anton Pelican)